

223851

鮑參軍集
昭明太子集
何水部集

謝宣城集
江文通集



中華書局印行

鮑氏集

四部備要

集部

上海中華書局據宋刻本

校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

版權所有 不許翻印

鮑照集序

散騎侍郎虞炎奉教撰

鮑照字明遠本上黨人家世貧賤少有文思宋臨川王愛其才以爲國侍郎王薨始興王濬又引爲侍郎孝武初除海虞令遷太學博士兼中書舍人

一本云時主多忌以文自高趙侍左右深逢風旨以此賦述不復出爲秣陵令又轉永嘉令大明

五年除前軍行參軍侍臨海王鎮荊州掌知內命尋遷前軍刑獄參軍事宋明帝初江外拒命及義嘉敗荆土震擾江陵人宋景因亂掠城爲景所殺時年五十餘身既遇難篇章無遺流遷人間者往往見在儲皇博採羣言遊好文藝片辭隻韻罔不收集照所賦述雖乏精典而有超麗爰命陪趨備加研訪年代稍遠零落者多今所存者儻能半焉

鮑氏集卷第一

舞鶴賦

蕪城賦

芙蓉賦

遊思賦

飛蛾賦

舞鶴賦

散幽經以驗物偉胎化之仙禽鍾浮曠之藻質抱清適之明心指蓬壺而翾翰望崑閬而揚音匝日域以迴驚窮天步而高尋踐神區其既遠積靈祀而方多精舍丹而星耀頂凝紫而烟華引圓吭之纖婉頓脩趾之鴻脩疊霜毛而弄影振玉羽而臨霞朝戲於芝田夕飲乎瑤池厭江海而遊澤掩雲羅而見羈去帝鄉之岑寂歸人寰之喧卑歲嶸嶸而催暮心惆悵而哀離於是窮陰殺節急景凋年涼沙振野箕風動天嚴嚴苦霧皎皎悲泉冰塞長河雪滿群山既而零昏夜歇景物澄廓星懸漢回曉月將落感寒雞之早晨憐霜鴈之遠漢臨驚風之蕭條對流光之照灼唳青響於丹墀舞容飛於金閣始連軒以鳳踰終宛轉而龍躍躑躅徘徊振迅騰摧驚身蓬集矯翅雪飛離網別赴合渚相依將與中止若往

而歸颯沓矜顧遷延遲暮逸翮後塵翺翥
先路指會規翔臨岐矩步態有遺妍貌無
停趣奔機逗節角睩分形長揚揚一作輕緩驚
並翼連聲輕迹凌亂浮影交橫衆變繁姿
參差游密煙交霧凝若無毛質風去雨還
不可談悉既散魂而盪目迷不知其所之
忽星離而雲羅整神容而自持仰天居之
崇絕更惆悵而驚思當是時也燕姬色沮
巴僮心恥巾拂兩停九劍雙止雖邯鄲其
敢倫豈陽阿之能擬入衛國而乘軒出吳
都而傾市守馴養於千齡結長悲於萬里

蕪城賦

登黃陵城作

瀾池平原南馳蒼梧漲海北走紫塞鴈門
拖以漕渠軸以崑崗重關複江之奧四會
五達之莊當昔全盛之時車掛轡人駕肩
塵閑撲地歌吹沸天華貨鹽田錐利銅山
才力雄富士馬精妍故能侈素法佚周令
劃崇墉剗濬洫圖脩世以休命是以板築
雉堞之殷井榦烽櫓之勤格高五嶽袤廣
三墳崢若斷岸矗似長雲製磁石以禦衝

糊頰壤以飛文觀基局之固護將萬祀而
一君出入三代五百餘載竟瓜割而豆分
澤葵依井荒葛罽途壇羅虺域階鬬麇
木魅山鬼野鼠城狐風嘯雨嘯昏見晨趨
飢鷹礪吻寒鴟嚇鷄伏暴藏虎乳血食膚
崩榛塞路崢嶸古植白楊早落塞草前衰
後稜霜氣薊薊風威孤蓬自振驚沙坐飛
灌莽杳而無際叢薄紛其相依通池既已
夷峻隅又已頽直視千里外唯見起黃埃
凝思寂聽心傷已摧若夫藻局黼帳歌堂
舞閣之基璇淵碧樹弋林釣渚之館吳蔡
齊秦之聲魚龍爵馬之玩皆薰歇燼滅光
沉響絕東都妙姬南國佳人蕙心紈質玉
貌絳脣莫不埋魂幽石委骨窮塵豈憶同
輦之愉樂離宮之苦辛哉天道如何吞恨
者多抽琴命操爲蕪城之歌歌曰邊風起
兮城上寒井徑滅兮丘隴殘千齡兮萬代
共盡今何言

芙蓉賦

感衣裳於楚賦詠憂思於陳詩訪群英之

艷絕標高名於澤芝會春陂乎夕張寧芙
蓉而水嬉抽我衿之桂蘭點子吻之瑜辭
選群芳之微號抱茲性之清芬稟若華之
驚絕單蘆陽之妙手測流池之光潔爍彤
輝之明媚粲雕霞之繁悅顧椒丘而非偶
豈園桃而能埒彪炳以舊藻翠景而紅波
青房兮規接紫的兮圓羅樹妖遙之弱幹
散菡萏之輕荷上星光而倒景下龍鱗而
隱波戲錦鱗而夕暎曜繡羽以晨過結遊
童之湘吹起榜妾之江歌備日月之溫麗
非盛明而謂何若乃當融風之暄盪承暑
雨之平渥被瑤塘之周流繞金渠之屈曲
排積霧而楊芬鏡洞泉而含綠葉折水以
爲珠條集露而成玉潤蓬山之瓊膏輝蕊
河之銀燭冠五華於仙草超四照於靈木
雜衆姿於開卷閱群貌於昏明無長袖之
容止信不笑之空城森紫葉以上擢紛湘
藥而下傾根雖割而瑄徹柯旣解而絲縈
感盛衰之可懷質始終而常清故其爲芳
也綢繆其爲媚也奔發對粧則色殊比蘭

則香越泛明綵於宵波飛澄華於曉月陋
荆姬之朱顏笑夏女之光髮恨狎世而貽
賤徒愛存而賞沒雖凌群以擅奇終從歲
而零歇

遊思賦

雲徑兮海衝上潮兮送風秋水兮駕浦涼
烟兮冒江暮氣起兮遠岸黑陽精滅兮天
際紅波汙汙兮無底山森森兮萬重平隰
今巨岸通川今瀉壑仰盡兮天經俯窮兮
地絡望波際兮疊疊眺雲間兮灼灼乃江
南之斷山信海上之飛鶴指煙霞而問鄉
窺林嶼而訪泊撫身事而識苦念親愛而
知樂苦與樂其何言悼人生之長役捨堂
宇之密親坐江潭而爲客對葦葭之遂黃
視零露之方白鴻晨驚以響湍泉夜下而
鳴石結中洲之雲蘿託綿思於遙夕瞻荆
吳之遠山望邯鄲之長陌塞風馳兮邊草
飛胡沙起兮鴈揚翩雖燕越之異心在禽
鳥而同戚悵收情而投淚遣繁悲而自抑
此日中其幾時彼月滿而將蝕生無患於

不老奚引憂以自逼物因節以卷舒道與
運而升息賤賣卜以當壚隱我耕而子織
誠愛秦王之奇勇不願絕筋而稱力已矣
哉使豫章生而可知夫何異乎叢棘

飛蛾賦

仙鼠伺闇飛蛾侯明均靈舛化詭欲齊生
觀齊生而欲詭各會性以憑方凌焦烟之
浮景赴熙炤之明光枝身幽草下畢命在
此堂本輕死以邀得雖糜爛其何傷豈學
山南之文豹避雲霧而謁藏

鮑氏集卷第一

鮑氏集卷第二

尺蠖賦

觀漏賦

野鵝賦

傷逝賦

園葵賦

尺蠖賦

智哉尺蠖觀機而作申非向厚屈非向薄
當靜泉渟遇躁風驚起軒軀以曠跨伏累
氣而併形冰炭弗觸鋒刃歷迕逢嶮蹶踣
值夷舒步忌好退之見脩哀必進而爲蠹
每驤首以瞰途常佇景而翻路故身不豫
託地無前期動靜必觀於物消息各隨乎
時從方而應何慮何思是以軍算慕其權
國容擬其變高賢圖之以隱淪智士以之
而藏見笑靈虵之久蟄羞龍德之方戰理
害道而爲尤事傷生而感賤苟見義而守
勇豈專取於弦箭

觀漏賦

并序

客有觀於漏者退而歎曰夫及遠者箭也

而定遠非箭之功爲生者我也而制生非
我之情故自箭而爲心不可憑者絃因生
以觀我不可恃者年憑其不可恃故以悲
哉况乎沉華密遠輕波潛耗而感神嬰慮
者又自外而傷壽以是思生生亦勤矣乃
爲賦云

佩流數於馳年纓華思於奔月結蘭荇以
望楚弄參差以歌越撫凝肌於遷滯鑑雕
容於髣髴景有墜而易昏憂無方而難歇
歷攷階而升隄訪金壺之盈闕觀騰波之
吞寫視驚箭之登沒箭既沒而復登波長
瀉而弗歸注沉穴而海漏射懸塗而電飛
墜戶牖而知天掩雲霧而測暉創百齡於
纖隱積千里於空微彼崢嶸而行盜此冉
冉而逾衰撫寸心而未改指分光而永遠
昔傷矢之奔禽聞虛弦之顛仆徒嬰刃而
知懼豈潛機之能覺惟生經之靈靡亦悲
長而權促橫證古而秉心抱空意其如玉
波沉沉而東注日滔滔而西屬落繁馨於
纖草頽豐華於喬木對吳離而後歌據窮

蹊而方哭雖接薪之更傳寧絕明之還續
貫古今而并念信寡易而多難時不留乎
激矢生乃急於走九既河源之莫壅又吹
波而助瀾神怵迴而多慮心慙轉而渺歡
望天涯而佇念擢雄劍而長歎嗟生民之
永迷躬與後而皆恤死零落而無二生差
池之非一理幽分於化前算冥定於天秩
與艾骨而招病猶剗腸而與疾情殊用而
俱盡事離方而同失聊弭志以高歌順烟
雨而沉逸於是隨秋鴻而汎渚逐春鷺而
登梁進賦詩而展念退陳酒以排傷物不
可以兩大得無得而雙昌薰晚華而後落
槿早秀而前亡姑屏憂以愉思樂茲情於
寸光從江河之紆直委天地之圓方漏盈
兮漏虛長無絕兮芬芳

野鵝賦

并序

有獻野鵝於臨川王世子愍其樊繫命爲
之賦其辭曰

集陳之隼以自遠而稱神栖漢之雀乃出
幽而見珍此瓌禽其何取亦厠景而承仁

捨水澤之驪逸對鍾鼓之悲辛豈徇利而
輕命將感愛而投身入長羅之逼脅恨高
繳之樊榮逸辭朋而別偶超煙驚而風行
跨日月而遙逝忽瞻國而望城踐菲迹於
瑤塗昇弱羽於丹庭瞰東西之繡戶眺左
右之金局貌纖殺而含一作悴心翻越而
慙驚若墜而墮谷悅不知其所寧惟君囿
之珍麗實妙物之所殷翔海澤之輕鷗巢
天宿之鳴鵠鷗程材於梟猛鵠薦體之雕
文既敷容以照景亦選翮以排雲雖居物
以成偶終在我以非羣望征雲而延悼顧
委翼而自傷無青雀之銜命乏赤鴈之嘉
祥空穢君之園池徒慙君之稻梁願引身
而剪迹抱末志而幽藏於是流歲遂遠慘
節方崇雲纏海岱風拂嶠潼飛雲一作馳
霰飄沙舞蓬視清池之初涸望綠林之始
空立菰蒲之寒渚託隻影而爲雙宛拔啄
而掩皆悲結悵而滿胃處朝晝而雖念假
外見而還排涉脩夜之長寂信專思而知
哀風梢梢而過樹月蒼蒼而照臺冰依岸

而早結霜託草而先摧歛雙翮於水裔翹孤趾於林隈情無方而兩集事有限而星乖在俄頃而猶悼矧窮生之所懷聞宿世之高賢澤無微而不均育草木而明義愛禽鳥而昭仁全殞卵而來鳳放乳麕而感麟雖陋生於萬物若沙漠之一塵苟全軀而畢命庶魂報以自申

傷逝賦

晨登南山望美中阿露團秋槿風卷寒蘿悽愴傷心悲如之何盡若窮煙離若剪絃如影滅地猶星殞天棄華宇於明世閉金局於下泉永山河以自畢眇千齡而弗旋思一言於向時邈衆代於古年逝稍遠而變體浸幽明而改時覽篇迹之如旦婉遺意而在茲忽若謂其不然自惆悵而驚疑循堂廡而下降歷幃戶而升基服委襟而褫帶器蒙管而韜絲志存業而遺績身先物而長辭豈重歡而可觀追前感之無期寒往暑來而不窮哀極樂反而有終燧已遷而禮革月既逾而慶通心微微而就遠

跡離離而絕容白日藹而回陰閨館寂而深重冀憑靈於前物佇美目乎房櫳徒望思以永久邈歸來其何從結單心於暮條掩行淚於晨風念沉悼而誰劇獨嬰哀於逝躬草忌霜而逼秋人惡老而逼衰誠衰耄之可忌或甘願而志違彼一息之短景乃累恨之長暉尋平生之好醜成黃塵之是非將滅耶而尙在何有去而無歸惟桃李之零落生有促而非夭觀龜鶴之千祀年能富而情少反靈質於二塗亂感悅於雙抱日月飄而不留命倏忽而誰保譬明隙之在梁如風露之停草髮迎憂而送華貌先悴而收藻共甘苦其幾人曾無得而偕老拂埃琴而抽思啓陳書而遐討自古來而有之夫何怨乎天道

園葵賦

風暖凌開土冒泉動游塵曝日鳴雉依隴主人拂黃冠拭藜杖布蔬種平圻壤通畔脩直膏畝夷敞白莖紫蒂豚耳鴨掌溝東陌西行三畦兩既區既鉏乃露乃映句萌

欲伸藂牙將散爾乃晨露夕陰霏雲四委
沉雷遠震飛雨輕洒徐未及晞疾而不靡
柔荇爰秀剛甲以解稚葉萍布弱陰竟抽
萋萋翼翼沃沃油油下葳蕤而被逕上參
差而履疇承朝陽之麗景得傾柯之所投
仕非魯相有不拔之利賓惟二仲無逸馬
之憂顧董荼而莫偶豈蘋藻之薦羞若乃
鄰老談稼女嫗歸桑拂此葦席炊彼粳梁
甃壺援醢曲瓢卷漿乃羹乃淪堆鼎盈筐
甘旨蒨脆柔滑芬芳消淋逐水潤胃調腸
於是既飫徹盤投筯回小人之腹爲君子
之慮近觀物運遠訪師聖聲數後彰律理
前定烏非黔黑鶴豈浴淨彼圓行而方止
固得之於天性伊冬簞而夏裘無雙功而
並盛盪然任心樂道安命春風夕來秋日
一作晨月晨映獨酌南軒擁琴孤聽篇章間作以
歌以詠魚深沉而鳥高飛孰知美色之爲
正

鮑氏集卷第三

代東武吟

一本已下並無代字

代出自薊北門行

代結客少年場行

代東門行

代苦熱行

代白頭吟

代蒿里行

代放歌行

代昇天行

代別鶴操

代雉朝飛

代淮南王二首

代空城雀

代鳴鴈行

代夜坐吟

代北風涼行

代春日行

代少壯時至衰老行

代陽春登荆山行

荆山一作荆

代朗月行

代堂上歌行

代貧賤愁苦行

代邊居行

代門有車馬客行

代悲哉行

代權歌行

代邽街行

一本作去邪行

代陳思王白馬篇

代陳思王京洛篇

代陸平原君子有所思行

代白紵曲二首

代白紵舞歌詞四首

一作始與王命作并登

代東武吟

主人且勿誼賤子歌一言僕本寒鄉士出身蒙漢恩始隨張校尉召募到河源後逐李輕車追虜出塞垣密塗亘萬里寧歲猶七奔肌力盡鞍甲心思歷涼溫將軍既下世部曲亦罕存時事一朝異孤續誰復論少壯辭家去窮老還入門腰鎌刈葵藿

倚杖牧雞豚昔如韞上鷹今似檻中猿徒
結千載恨空負百年怨棄席思君幄疲馬
戀君軒願垂晉主惠不媿田子魂

代出自薊北門行

羽檄起邊亭烽火入咸陽徵師屯廣武分
兵救朔方嚴秋筋竿勁虜陣精且強天子
按劍怒使者遙相望鴈行緣石徑魚貫渡
飛梁簫鼓流漢思旌甲被胡霜疾風衝塞
起沙礫自飄揚馬毛縮如蝟角弓不可張
時危見臣節世亂識忠良投軀報明主身
死爲國殤

代結客少年場行

驄馬金絡頭錦帶佩吳鉤失意杯酒間白
刃起相讎追兵一旦至負劍遠行遊去鄉
三十載復得還舊丘昇高臨四關表裏望
皇州九塗平若水雙闕似雲浮扶宮羅將
相夾道列王侯日中市朝滿車馬若川流
擊鍾陳鼎食方駕自相求今我獨何爲埴
壤懷百憂

代東門行

傷禽惡弦驚一作驚倦客惡離聲離聲斷客情
賓御皆涕零涕零心斷絕將去復還訣一
息不相知何況異鄉別遙遙征駕遠杳杳
白日晚居人掩閨臥行子夜中飯野風吹
秋木行子心腸斷食梅常苦酸衣葛常苦
寒絲竹徒滿坐憂人不解顏長歌欲自慰
彌起長恨端

代苦熱行

赤坂橫西阻火山赫南威身熱頭且痛鳥
墜魂來歸湯泉發雲潭焦烟起石圻一作
日月有恆昏雨露未嘗晞丹蛇踰百尺玄
蜂盈十圍含沙射流影吹蠱病行暉瘴氣
晝熏體草露夜霑衣饑餒莫下食晨禽不
敢飛毒涇尙多死渡瀘寧具腓生軀蹈死
地昌志登禍機戈船榮旣薄伏波賞亦微
爵輕君尙惜士重安可希

代白頭吟

直如朱絲繩清如玉壺冰何慙宿昔意猜
恨坐相仍人情賤恩舊世議逐衰興毫髮
一爲瑕丘山不可勝食苗實碩鼠黠白信

蒼蠅鳬鵠遠成美薪芻前見陵申黜褒女
進班去趙姬昇周王日淪惑漢帝益嗟稱
心賞猶難恃貌恭豈易憑古來共如此非
君獨撫膺

代蒿里行

同盡無貴賤殊願有窮申馳波催永夜零
露逼短晨結我幽山駕去此滿堂親虛容
遺劍佩實貌戢衣巾斗酒安可酌尺書誰
復陳年代稍推遠懷抱日幽淪人生良自
劇天道與何人齎我長恨意歸爲狐兔塵

代放歌行

蓼蟲避葵堇習苦不言排小人自齷齪安
知曠士懷雞鳴洛城裏禁門平日開冠蓋
縱橫至車騎四方來素帶曳長飈華纓結
遠埃日中安能止鐘鳴猶未歸夷世不可
逢賢君信愛才明慮自天斷不受外嫌猜
一言分珪爵片善辭草萊豈伊白璧賜將
起黃金臺今君有何疾臨路獨遲迴

代昇天行

家世宅關輔勝帶宦王城備聞十帝事委

曲兩都情倦見物興衰驟觀俗屯平翻翻
若回掌恍惚似朝榮窮途悔短計晚志重
長生從師入遠岳結友事仙靈五圖發金
記九籀隱丹經風餐委松宿雲臥恣天行
冠霞登綵閣解玉飲椒庭鬢遊越萬里少
別數千齡鳳臺無還駕簫管有遺聲何時
與汝曹啄腐共吞腥

代別鶴操

雙鶴俱起時徘徊滄海間長弄若天漢輕
軀似雲懸幽客時結侶提攜遊三山青繳
凌瑤臺丹羅籠紫烟海上悲風急三山多
雲霧散亂一相失驚孤不得住緬然日月
馳遠矣絕音儀有願而不遂無怨以生離
鹿鳴隱深草蟬鳴隱高枝心自有所存旁
人那得知

代雉朝飛

雉朝飛振羽翼專場挾兩一本下恃強力
媒已驚翳又逼黃間潛殺盧矢直勿繡頸
碎錦臆絕命君前無怨色握君手執杯酒
意氣相傾死何有

代淮南王二首

淮南王好長生服食鍊氣讀仙經琉璃藥
椀牙作盤金鼎玉七合神丹神丹神丹戲
紫房紫房綵女弄明璫鸞歌鳳舞斷君腸
朱城九門門九閨願逐明月入君懷入君
懷結君佩怨君恨君恃君愛築城思堅劍
思利同盛同衰莫相棄

代空城雀

雀乳四轂空城之阿朝食野粟夕飲冰河
高飛畏鴟鵂下飛畏網羅辛傷伊何言怵
迫良已多誠不及青鳥遠食玉山禾猶勝
吳宮鷺無罪得焚窠賦命有厚薄長歎欲
如何

代鳴鴈行

邕邕鳴鴈鳴始旦齊行命侶入雲漢中夜
相失羣離亂留連徘徊不忍散憔悴容儀
君不知辛苦風霜亦何爲

代夜坐吟

冬夜沉沉夜坐吟含聲未發已知心霜入
幕風度林朱燈滅朱顏尋體君歌逐君音

不貴聲貴意深

代北風涼行

北風涼雨雪零京洛女兒多嚴粧遙豔帷
中自悲傷沉吟不語若有忘問君得行何
當歸苦使妾坐自傷悲慮年至慮顏衰情
易遠恨難追

代春日行

獻歲發吾將行春山茂春日明園中鳥多
嘉聲梅始發桃始青汎舟鱸齊權驚奏採
菱歌鹿鳴風微起波微生絃亦發酒亦傾
入蓮池折桂枝芳神動芬葉披兩相思兩
不知

代少年時至衰老行

憶昔少年時馳逐好名晨結友多貴門出
入富兒鄰綺羅艷華風車馬自揚塵歌唱
青琴女彈箏燕趙人好酒多芳氣饒味厭
時新今日每相念此事邈無因寄語後生
子作樂當及春

代陽春登荆山行

荆山一作京

旦登荆山頭崎嶇道難遊早行犯霜露苔

滑不可留極眺入雲表窮目盡帝州方都
列萬室層城帶高樓奕奕朱軒馳紛紛高
衣流日氣映山浦暄霧逐風收花木亂平
原桑柘盈一作平疇攀條弄紫莖藉露折
芳柔遇物雖成趣念者不解憂且共傾春
酒長歌登山丘

代朗月行

朗月出東山照我綺窗前窗中多佳人被
服妖且妍靚粧坐帳裏當戶弄清絃鬢奪
衛女迅體絕飛燕先爲君歌一曲當作朗
月篇酒至顏自解聲和心亦宣千金何足
重所存意氣間

代堂上歌行

四坐且莫諠聽我堂上歌昔仕京洛時高
門臨長河出入重宮裏結交曹與何車馬
相馳逐賓朋好容華陽春孟春月朝光散
流霞輕步逐芳風言笑弄丹葩暉暉朱顏
醺紛紛織女梭滿堂皆美人自我對湘娥
雖謝侍君閑明粧帶綺羅箏笛更彈吹高
唱好相和萬曲不關心一曲動情多欲知

情厚薄更聽此聲過

代貧賤愁苦行

湮沒雖死悲貧苦卽生劇長歎至天曉愁
苦窮日夕盛顏當少歇鬢髮先老白親友
四面絕朋知斷三益空庭慙樹萱藥餌媿
過客貧年忘日時黯黯就人惜俄頃不相
酬慙怩面已赤或以一金恨便成百年隙
心爲千條計事未見一獲運圯津塗塞遂
轉死溝洫以此窮百年不如還窀穸

代邊居行

少年遠京一作陽遙遙萬里方陋巷絕人徑
茅屋摧山崗不覩車馬迹但見麋鹿場長
松何落落丘隴無復行邊地無高木蕭蕭
多白楊盛年日月盡一去萬恨長悠悠世
中人爭此錐刀忙不憶貧賤時富貴輒相
忘紛紛徒滿目何關慨予傷不如一畝中
高會挹清漿遇樂便作樂莫使候朝光

代門有車馬客行

門有車馬客問客何鄉士捷步往相飢果
得舊鄰里悽悽聲中情慊慊增下理一作語

昔有故悲論今無新喜清晨相訪慰日暮
不能已歡戚競尋緒談調何終止辭端竟
未究忽唱分途始前悲尙未弭後感方復
起嘶聲盈我口談言在君耳手迹可傳心
願爾駕一作駕行李

代悲哉行

羈人感淑景緣欲回轍我行詎幾時華
實驟舒結觀實情有悲瞻華意無悅覽物
懷同志如何復乖別翩翩翔禽羅關關鳴
鳥列翔鳴尙嘯偶所歎獨乖絕

代權歌行

羈客離嬰時飄飄無定所昔秋寓江介茲
春客河澣往戢于役身願言永懷楚泠泠
篠疏潭邕邕鴈循渚颺戾長風振搖曳高
帆舉驚波無留連舟人不躊躇

代邽街行一本作邽街

竚立出門衢遙望轉蓬飛蓬去舊根在連
翩逝不歸念我捨鄉俗親好久乖違慷慨
懷長想惆悵戀音徽人生隨時變遷化焉
可祈百年難必果千慮易盈虧

代陳思王白馬篇

白馬駢角弓鳴鞭乘北風要途問邊急雜
虜入雲中閉壁自往夏清野徑還冬僑裝
多闕絕旅服少裁縫埋身守漢節沉命對
胡封薄暮塞雲起飛沙披遠松含悲望兩
都楚歌登四墉丈夫設計誤懷恨逐邊戎
罷別中國愛邀冀胡馬功去來今何道單
賤生所鍾但令塞上兒知我獨爲雄

代陳思王京洛篇

鳳樓十二重四戶八綺牕繡桷金蓮花桂
柱玉盤龍珠簾無隔露羅幌不勝風寶帳
三千所爲爾一朝容揚芬紫煙上垂綵綠
雲中春吹回白日霜歌落塞鴻但懼秋塵
起盛愛逐衰蓬坐視青苔滿臥對錦筵空
琴瑟縱橫散舞衣不復縫古來共歎薄君
意豈獨濃唯見雙黃鵠千里一相從

代陸平原君子有所思行

西出登雀臺東下望雲闕層閣肅天居馳
道直如髮繡轡結飛霞璇題納行月築山
擬蓬壺穿池類溟渤選色遍齊岱徵聲匝